





玉臺新詠卷五目錄

陳東海徐陵編

梁武帝

擣衣

擬長安有俠斜


擬明月照高樓

擬青青河邊草

代蘇屬國婦

古意二首

芳樹





臨高臺

有所思

紫蘭始萌

織婦

七夕

戲作

梁昭明太子

蓮舟買荷度

照流看落釵

長相思

名士悅傾城

美人晨粧

梁簡文帝

有女篇

美女篇

艷歌曲

蜀國弦歌

妾薄命篇

楚妃歎

倡婦怨情



怨歌行二首

獨處怨

傷美人

新成安樂宮

雙桐生空井

雞鳴高樹顛

擬落日窓中坐

洛陽道

折楊柳

紫騮馬

南湖

北渚

大堤

春日

春宵

秋夜

冬曉

春閨情

詠晚閨

秋閨夜思



和湘東王陽雲臺簷柳

和徐錄事見內人作卧具

戲贈麗人

聽夜妓

林下妓

詠內人晝眠

詠美人觀畫

詠中婦織流黃

嬖童

權歌行

夜夜曲

當壚曲

從頓還南城

晚景出行

和人以妾換馬

詠人去妾

戲作謝惠連體

執筆戲書

率爾成詠

詠舞



七夕

詠雪

採蓮

採桑

半路溪

大垂手

小垂手

賦樂名得筵篔

梁元帝

代舊姬有怨

傷別離

春夜看妓

戲作艷詩

登顏園故閣

夜遊栢齋

和劉上黃

詠風

詠晚栖鳥

看摘薔薇

洛陽道



折揚柳

金樂歌

古意

春日

春宵

秋夜

梁邵陵王綸

代秋胡婦閨怨

車中見美人

見姬人

梁武陵王紀

同蕭長史看妓

和湘東王夜夢應令

曉色

玉臺新詠卷五目錄終



玉臺新詠卷五

陳東海徐陵編 明歙方大法校

擣衣

梁武帝

駕言易水北送別河之陽  
沉思慘行鑿結夢在  
空牀既寤丹綠謬始知  
紈素傷中州木葉下邊  
城應早霜陰虫日慘烈  
庭草復云黃金風徂清  
夜明月懸洞房娟娟同  
宮女助我理衣裳參差  
夕杵引哀怨秋砧揚輕  
羅飛玉腕弱翠低紅粧  
朱顏日已興盼睇色增  
光擣以一匪石文成雙  
鴛鴦制握斷金刀薰用  
如蘭芳佳期久不歸持



此寄寒鄉妾身誰與容思君苦入腸

擬長安有狹斜

洛陽有曲陌陌曲不通驛忽逢二少童扶轡問  
君宅君宅邾鄆右易憶復可知大息組網縕中  
息珮陸離小息尚青綺總轡遊南皮三息俱入  
門家臣拜門垂三息俱升堂旨酒盈千卮三息  
俱入戶戶內有光儀大婦理金翠中婦事玉觴  
少婦獨閑暇調笙遊曲池丈夫少徘徊鳳吹方  
參差

擬明月照高樓

圓魄當虛闥清光流思筵筵思對孤影悽怨還  
自憐臺鏡早生塵匣琴又無絃悲慕屢傷節離  
憂亟華年君如東扶景妾似西柳煙相去旣路  
迥明晦亦殊懸願爲銅鐵轡以感長樂前

擬青青河邊草

幕幕綉戶絲悠悠懷昔期昔期久不歸鄉國曠  
音徽音徽空結遲半寢覺如至旣寤了無形與  
君隔死生月以雲掩光葉以霜催老當塗兢自  
容莫肯與妾道

代蘇屬國婦



良人如我期不謂當過時秋風忽送節白露疑  
前基愴愴獨涼枕悵悵孤月惟忽聽西北鴈似  
從東海湄果啣萬里書中有生離辭惟言長別  
矣不復道相思胡羊久剽奪漢節故支持帛上  
看未終臉下淚如絲空懷之死誓遠勞同穴詩

古意二首

其一

飛鳥起離離驚散忽差池嗷嘈繞樹上翩翩集  
寒枝旣悲征役久偏傷壠上兒寄言閨中妾此  
心詎能知不見松蘿上葉落根不移

其二

當春有一草綠花復垂枝云是忘憂物生在北  
堂墮飛飛雙蛺蝶低低兩差池差池低復起此  
芳性不移飛蝶雙復隻此心人莫知

芳樹

綠樹始搖芳芳生非一葉一葉度春風芳華自  
相接雜色亂參差衆花紛重疊重疊不可思思  
此誰能愜

臨高臺

高臺半行雲望望高不極草樹無參差山河同



一色髣髴洛陽道道遠難別識玉階故情人情  
來共相憶

有所思

誰言生離久適意與君別衣上芳猶在握裏書  
未減腰間雙綺帶夢爲同心結常恐所思露瑤  
花未忍折

紫蘭始萌

種蘭玉臺下氣暖蘭始萌芬芳與時發婉轉迎  
節生獨使金翠嬌偏動紅綺情二遊何足壞一  
顧非傾城羞將苓芝侶豈畏鷓鴣鳴

織婦

送別出南軒離思沉幽室調梭輟寒夜鳴機罷  
秋月良人在萬里誰與共成匹願得一迴光照  
此憂與疾君情尚未忘妾心長自畢

七夕

白露月下團秋風枝上鮮瑤臺生碧霧瓊幕含  
紫烟竒會非妙節佳期乃良年玉壺承夜急蘭  
膏依曉煎昔悲漢難越今傷河易旋怨咽雙念  
斷淒切兩情懸

戲作



宓妃生洛浦遊女出漢陽妖閑逾下蔡神妙絕  
高唐綿駒且變俗王豹復移鄉况茲集靈異豈  
得無方將長袂必留客清哇咸繞梁燕趙羞容  
止西施慙芬芳徒聞殊可弄定自之明璫

蓮舟買荷度

梁昭明太子

採蓮前岸隈舟子屢徘徊披衣可識風踈荷香  
不來欲知當度處當看荷葉開

照流看落釵

相隨照綠水意欲重涼風梳搖粧影壞釵落髮  
花空佳期在何許徒傷心不同

長相思

相思無終極長夜起嘆息徒見貌嬋娟寧知心  
有憶寸心無以因願附歸飛翼

名士悅傾城

美人稱絕世麗色譬花叢雖居李城北來往宋  
家東教歌公主第學舞漢成宮多遊淇水上好  
在鳳樓中履高疑上砌裾開特畏風衫輕見跳  
脫珠概雜青虫垂絲遶帷幔落日度房櫳粧窓  
隔柳色井水照桃紅非憐交甫珮羞使春閨空

美人晨粧



北窓向朝鏡錦帳復斜縈嬌羞不肯出猶言粧  
未成散黛隨眉廣燕脂逐臉生試將持出衆定  
得可憐名

有女篇

梁簡文帝

凌晨光景麗倡女鳳樓中前瞻削成小傍望卷  
旌空分粧開淺靨繞臉傅斜紅張瑟未調軫飲  
吹不全終自知心所愛出入仕秦宮誰言連尹  
屈更是莫敖通輕輶綴皂蓋飛轡轅雲駉金鞍  
隨繫尾銜璫映躔駿戈鏤荆山玉劍飾丹陽銅  
左把蘇合彈傍持大屈弓控弦因鵲血挽繯用

牛螭弋獵多登隴酣歌每入豐暉暉隱落日冉  
冉還房櫳燈生陽燧火塵散鯉魚風流蘇時下  
帳象簾復韜筒霧暗窓前柳寒踈井上桐女蘿  
託松際甘瓜蔓井東拳拳恃君愛歲暮望無窮

美女篇

佳麗盡關情風流最有名約黃能效月裁金巧  
作星粉光勝玉靚衫薄擬蟬輕密態隨羞臉嬌  
歌逐軟聲朱顏半已醉微笑隱香屏

艷歌行

雲楣桂成戶飛棟杏爲梁斜窓通葢氣細隙引



塵光裁衣魏后尺汲水淮南床青驪暮當返預  
使羅裙香

蜀國弦歌

銅梁望絕國劍道望中區通星上分野作固下  
爲都雅歌因良守妙舞自巴渝陽城嬉樂所劍  
騎鬱相趨五婦行難至百兩好游娛牲祈望帝  
祀酒酌蜀侯姝江妃納重聘卓女愛將雛停絃  
時繫瓜息吹理脣朱脫衫湔錦浪廻扇避陽鳥  
聞君旌節返賤妾下城隅

妾薄命篇

名都多麗質本自恃容姿蕩子行未至秋胡無  
定期玉貌歇紅臉長顰串翠眉奩鏡迷朝色縫  
針脆故絲本異搖舟咎何關竊席疑生離誰撫  
背溘死詎來遲玉嬙貌本絕踉蹌入羶帷盧姬  
嫁日晚非復好年時轉山猶可逐烏白望難追  
妾心徒自苦傍人會見嗤

楚妃歎

閨幽情脉脉漏長宵寂寂草螢飛夜戶絲虫繞  
秋壁薄笑未爲欣微歎還成戚金簪鬢下垂玉  
筋衣前滴



倡婦怨情

綺窓臨盡閣飛閣繞長廊風散同心草月散可  
憐光髮髯簾中出妖麗特非常耻學秦羅髻羞  
爲樓上粧散誕披紅帔生情新約黃斜燈入錦  
帳微烟出玉房六安雙玳瑁八幅兩鴛鴦猶是  
別時許留值解心傷含情生度日俄頃變炎涼  
玉關驅夜雪金氣落嚴霜飛狐驛使斷交河川  
路長蕩子無消息朱脣徒自傷

怨歌行

十五頗有餘日照杏梁初蛾眉本多嫉掩鼻特

成虛持此傾城貌翻爲不肖軀秋風吹海水寒  
霜依玉除月光臨戶駛荷花依浪舒望管悲雙  
翼窺沼泣王餘苔生履處沒草合行人踈裂紈  
傷不盡歸骨恨難祛早知長信別不避后園輿

獨處怨

獨處恒多怨開幕試臨風彈碁鏡奩上傳粉高  
樓中自從征馬去音信不曾通只恐金屏掩明  
年已復空

傷美人

昔聞倡女別蕩子無歸期今似陳王嘆流風難



重思翠帶留餘結苔階沒故基圖形更非是夢  
見反成疑燠燠含好氣庭樹吐華滋香燒日有  
歇花落無還時

新成安樂宮

遙看雲霧中耿耿映丹紅珠簾通曉日金花拂  
夜風欲知歌管處來過安樂宮

雙桐生空井

季月雙桐井新枝雜舊株晚葉藏栖鳳朝花拂  
曙鳥還看西子照銀床牽轆轤

雞鳴高樹顛

碧玉好名倡夫婿侍中郎桃花全覆井金門半  
隱堂時欣一來下復此雙鴛鴦雞鳴天尚早東  
鳥定未光

擬落日窓中坐

杏梁斜日照餘暉映美人開函脫寶釧向鏡理  
紈巾游魚動池葉舞鶴散階塵空嗟千歲久願  
得及陽春

洛陽道

洛陽佳麗所大道滿春光游童初挾彈蚕妾始  
提筐金鞍照龍馬羅袂拂春桑王車爭晚入潘



果溢高箱

折楊柳

楊柳亂成絲攀折上春時葉密鳥飛礙風輕花  
落遲城高短簫發林空畫角悲曲中無別意併  
是爲相思

紫騮馬

賤妾朝下機正值良人歸青絲懸玉鐙朱汗染  
香衣驟急珂彌響跳多塵亂飛雕胡幸可薦故  
心君莫違

南湖

南湖荇葉浮復有佳期遊銀綸翡翠釣玉管芙  
蓉舟荷香亂衣麝權聲隨急流

北渚

岸陰垂柳葉平江含粉蝶好值城傍人多逢蕩  
舟妾綠水濺長袖浮苔染輕楫

大堤

宜城斷中道行旅極流連出妻工織素妖姬慣  
數錢炊彫留上客貫酒逐神仙

春日

年還樂應滿春歸思復生桃含可憐紫柳發斷



腸青落花隨燕入遊絲帶蝶驚邯鄲歌管地見  
許欲留情

春宵

花樹含春叢羅幃夜長空風聲隨篠韻月色與  
池同綵牋徒自變無信往雲中

秋夜

高秋度幽谷墜露下芳枝綠潭倒雲氣青山銜  
月眉花心風上轉葉影樹中移外遊獨千里夕  
歎誰共知

冬曉

冬朝日照梁含怨下前床帳寒竹葉帶鏡轉菱  
花光會是無人見何用早紅粧

春閨情

楊柳葉纖纖佳人懶織縑正衣還向鏡迎春試  
捲簾摘梅多繞樹覓燕好窺簷只言逐花草計  
較應非嫌

詠晚閨

珠簾向暮下妖姿不可追花風暗裏覺蘭燭帳  
中飛何時玉窓裏夜夜更縫衣

秋閨夜思



非關長信別詎是良人征九重忽不見萬恨滿  
心生夕門掩魚鑰宵牀悲畫屏迴月臨窓度吟  
虫繞砌鳴初霜賈細葉秋風驅亂螢故粧猶累  
日新衣襞未成欲知妾不寐城外擣衣聲

和湘東王陽雲臺簷柳

曖曖陽雲臺春柳發新梅柳枝無極軟春風隨  
意來潭沲青帷閉玲瓏朱扇開佳人有所望車  
聲非是雷

和徐錄事見內人作卧具

客房寒日晚落照度窓邊紅簾遙不隔輕帷半

捲懸方知織手製詎戒縫裳妍龍刀橫膝上畫  
尺墮衣前熨斗金塗色簪管白牙躔衣裁合歡  
攝文作鴛鴦連針用雙縫縷絮用八蠶綿香和  
麗丘密麝吐中臺烟已入琉璃帳蕪雜太華氈  
且向雕爐暖非同團扇拍更恐從軍別空牀徒  
自憐

戲贈麗人

麗姬與妖嬈共拂可憐粧同安鬟裏撥異作額  
間黃羅裙宜細簡畫屨重高牆含羞來上砌微  
笑出長廊取花爭問色板枝念蕊香但歌聊一



曲鳴絃未肯張自矜心所愛三十侍中郎

聽夜妓

合歡蠲忿葉萱草忘憂條何如明月夜流風拂  
舞腰朱唇隨吹動玉釧逐絃搖留賓惜殘弄負  
態動餘嬌

林下妓

炎光向夕歛促宴臨前池泉同聲相得花與面  
相宜管聲引鳥哢舞狀寫風枝歡樂不知醉千  
秋長若斯

詠內人晝眠

北窓聊就枕南簷日未斜攀鉤落倚障插揆舉  
琵琶夢笑開嬌靨眠鬟壓落花簾文生玉腕香  
汗浸紅紗夫婿恒相伴莫悞是倡家

詠美人觀畫

殿上圖神女宮裏出佳人可憐俱是畫誰能辨  
僞真分明淨眉目一種細腰身所有特爲異長  
有好精神

詠中婦織流黃

翻花滿階砌愁人獨上機浮雲西北起孔雀東  
南飛調絲時繞腕易躡乍牽衣鳴梭逐動釧紅



粧映落暉

變童

變童嬌麗質踐董復超瑕羽帳晨香滿珠簾夕  
漏賒翠被含鴛色雕床鏤象牙妙年同小史妹  
貌似朝霞袖裁連璧錦牋織細種花攬袴輕紅  
出迴頭雙鬢斜嬾眼時含笑王手乍攀花懷猜  
非後約密愛似前車定使燕姬妬彌令鄭女嗟

擢歌行

妾家住湘川菱歌本自便風生解刺浪水深能  
捉船葉亂由牽荇絲飄爲折蓮濺粧疑薄汗霑  
衣似故漭浣紗流暫濁汰錦色還鮮參同趙飛  
燕借問李延年從來入絃管誰在擢歌前

夜夜曲

靄靄夜中霜河開向曉光枕啼常帶粉身眠不  
着牀蘭膏斷更益薰爐戒復香但問愁多少便  
知夜短長

當爐曲

十五正團圓流光滿上蘭當爐設夜酒宿客解  
金鞍迎來挾瑟易送別唱歌難欲知心恨急翻  
令衣帶寬



從頓還南城

漢渚水初綠江南草復黃日暖蒲心發風吹梅  
蕊香征艫艤湯塹歸騎息金隍舞觀衣常襞歌  
臺絃未張持此橫行去誰念守空牀

晚景出行

細樹含殘影春閨散晚香輕花鬢邊墮微汗粉  
中光飛鳧初罷曲啼鳥忽度行羞令白日暮車  
騎鬱相望

和人以妾換馬

功名幸多種何事苦生離誰言似白玉定是愧

青驪必取匣中釧迴作飾金羈真成恨不已願  
得路傍兒

詠人去妾

昔時嬌玉步含羞花燭邊豈言心愛斷啣啼私  
自憐常見歡成怨非關醜易妍獨鵠罷中路孤  
鸞死鏡前

戲作謝惠連體

雜蕊映南庭庭中光影媚可憐枝上花早得春  
風意春風復有情拂幔且開楹盈盈開碧煙拂  
幔復垂蓮偏使紅花散飄揚落眼前眼前多無



况參差鬱相望珠繩翡翠帷綺幕芙蓉帳香煙  
出窓裏落月斜階上月影去遲遲節花咸在茲  
桃枝紅若點柳葉亂如絲絲條轉暮光影落暮  
光長春燕雙雙舞春心處處揚酒滿心聊足萱  
枝愁不恣

執筆戲書

舞女及燕姬倡樓復蕩婦參差大戾發搖曳小  
垂手釣竿蜀國彈新城折楊柳玉案西王桃蠶  
杯石榴酒甲乙羅帳異辛壬房戶暉夜夜有明  
月時憐更衣

率爾成詠

借問仙將畫詎有此佳人傾城且傾國如雨復  
如神漢后憐飛燕周王重姓申挾瑟曾遊趙吹  
蕭屢入秦玉階偏望樹長廊每逐春約黃出意  
巧纏絃用法新迎風時引袖避日暫披巾踈花  
映髻插細佩遶衫身誰知日欲薄含羞不自陳

詠舞

戚里多妖麗重聘茂燕余逐節工新舞嬌態似  
凌虛納花承禱概垂翠逐璫舒扇開衫影亂巾  
度履行踈徒勞交甫憶自有專城居



七夕

秋期此時決長夜從河靈紫烟凌鳳羽紅光隨  
玉駟洛陽疑劍氣成都怪客星天梭織來又方  
逢今夜停

詠雪

晚霞飛銀礫浮雲暗未開入池消不積因風墮  
復來思婦流黃素温姬玉鏡臺看花言可折定  
自非春梅

採蓮

晚日照空磯採蓮承晚暉風起湖難度蓮多摘

未稀掉動芙蓉落船移白鷺飛荷絲傍繞腕菱  
角遠牽衣常聞蕖可愛採擷欲爲裙葉滑不留  
縊心忙無假薰千春誰與樂唯有妾隨君

採桑

春色映空來先發院邊梅細萍重疊長新花歷  
亂開連珂往淇上接幃至叢臺叢臺可憐妾當  
窻望飛蝶息跌行衫領鬢斗成禡禡下林著珠佩捉鏡安花鑷薄晚長  
採春桑葉寄語採桑伴訝今春日短枝高攀不及葉細籠難滿年年將使君歷  
亂遣相聞欲知琴裏意還贈錦中又何當照梁日遠作入山雲重門皆  
已閉方知客留袂可憐黃金絡複以青絲繫必也爲人時誰令與夫婿

半路溪

相逢半路溪隔溪猶不渡望望判知是翩翩識



行步摘贈蘭澤芳欲表同心句先將動舊情恐  
君疑妾妬

大垂手

垂手忽若若飛燕掌中嬌羅衣恣風引輕帶任  
情搖詎似長沙地促舞不迴腰

小垂手

舞女出西秦躡影舞陽春且復小垂手廣袖拂  
紅塵折腰應兩箇頓足轉雙巾蛾眉與慢臉見  
此空愁人

賦樂名得箜篌

揆遲初挑吹弄急時催舞釧響逐絃鳴私迴半  
障柱欲知心不平君看黛眉聚

代舊姬有怨

梁元帝

寧爲萬里別乍作死生離那堪眼前見故愛逐  
新移未展春花落遽被秋風吹怨黛舒還歛啼  
粧拭更垂誰能巧爲賦黃金妾不貲

傷別離

朝望青波道夜上白登臺月中含桂樹流影自  
徘徊寒沙逐風起春花犯雪開夜長無與悟衣  
單爲誰裁



春夜看妓

蛾眉漸成光燕姬戲小堂朝舞開春閣鈴盤出  
步廊起龍調節奏却鳳點笙簧樹交臨舞席荷  
生夾妓航竹密無分影花踈有異香舉杯聊轉  
笑歡茲樂未央

戲作艷詩

入堂值小婦出門逢故夫含辭未返吐絞袖且  
踟躕搖茲扇似月掩此淚如珠今懷同無已故  
情今有餘

登顏園故閣

高樓三五夜流影入丹墀先時留上客夫婿芙  
蓉姿粧成理蟬鬢笑罷歛蛾眉衣香知步近釧  
動覺行遲如何舞館樂翻見歌梁悲猶懸北窓  
幌未捲南軒帷寂寂空郊暮非復少年時

夜宿栢齋

燭暗行人靜簾開雲影入風細雨聲遲夜短更  
籌急能下班姬淚復使倡樓泣况此客遊人中  
宵空佇立

和劉上黃

新鶯隱葉轉新燕向窓飛柳絮時依酒梅花乍



入衣玉珂輕風度金鞍映日暉無令春色晚獨  
望行人歸

詠風

樓上起朝粧風花下砌傍入鏡先飄粉翻衫好  
染香度舞飛長袖傳歌共繞梁欲因吹少女還  
將拂大王

詠晚栖鳥

日暮連翩翼俱向上林栖風多前鳥駛雲暗後  
群迷路遠聲難徹飛斜行未齊應從故鄉返幾  
過入閨閨借問倡樓妾何如蕩子妻

看摘薔薇

倡女倦春閨迎風戲玉除近叢看影密隔樹望  
釵踈橫枝斜縮袖嫩葉下牽裾墻高舉不及花  
新摘未舒莫疑掉髻少分人猶有餘

洛陽道

洛陽開大道城北達城西青槐隨幔拂綠柳逐  
風低玉珂鳴戰馬金瓜闔場雞桑萎日行暮多  
逢秦氏妻

折楊柳

巫山巫峽長垂柳復垂楊同心宜同折故人懷



故鄉山似蓮花艷  
流如明月光  
寒夜猿鳴徹  
遊人淚沾裳

金樂歌

啼鳥怨別偶  
曙鳥憶誰家  
石厥題書字  
金燈飄落花  
東方曉星沒  
西山落日斜  
縠衫迴廣袖  
團扇掩輕紗  
暫借青驄馬  
來送黃牛車

古意

妾在成都縣  
願作高塘雲  
樽中石榴酒  
機上蒲萄裙  
停梭還歛色  
何時勸使君

春日

春還春節美  
春日春風過  
春心日日異  
春情處處多  
處處春芳動  
日日春禽變  
春意春已繁  
春人春不見  
不見懷春人  
徒望春光新  
春愁春自結  
春結誰能申  
欲道春園趣  
復憶春時人  
春人竟何在  
空爽上春期  
獨念春花落  
還似昔春時

寒宵

烏鵲夜南飛  
良人行未歸  
池水浮明月  
寒風送擣衣  
願織迴文錦  
因君寄武威

秋夜

秋夜九重空  
蕩子怨房櫳  
燈光入綺帷  
簾影穿



屏風金徽調玉軫茲夜撫離鴻

代秋胡婦閨怨

梁邵陵王綸

蕩子從游宦思妾守房櫳塵鏡朝朝掩寒衾夜  
夜空若非新有悅何事久西東知人相憶否淚  
盡夢啼中

車中見美人

關情出眉眼軟媚着腰肢語笑能嬌嬖行步絕  
逶迤空中自迷惑渠傍會不知懸念猶如此得  
時應若爲

見姬人

春來不復賒入苑駐行車比來粧點異今世撥  
鬟斜却扇承枝影舒衫受落花狂夫不妬妾隨  
意晚還家

同蕭長史看妓

梁武陵王紀

燕姬奏妙舞鄭女發清歌迴羞出慢臉送態入  
嚙娥寧殊值行雨詎減見凌波想君愁日暮應  
羨魯陽戈

和湘東王夜夢應令

昨夜夢君歸賤妾下鳴機懸知君意薄不着去  
時衣故言如夢裏賴得鴈書飛



曉色

晨禽爭學嘯朝花亂欲開  
爐烟入斗帳屏風隱  
鏡臺紅粧隨淚盡  
蕩子何時廻

玉臺新詠卷五終

玉臺新詠卷六目錄

陳東海徐陵編

范雲

巫山高

望織女

閨思

送別

江淹

征怨

詠美人春遊



西洲曲

古別離

班婕妤扇

張司空離情

潘黃門述哀

休上人怨別

丘遲

敬訓柳僕射征怨

荅徐侍中為人贈婦

沈約

登高望春

春思

初春

昭君辭

塘上行

携手曲

夜夜曲

有所思

領邊繡

脚下履



擬青青河邊草

擬三婦

古意

効古

夢見美人

少年新婚爲之詠

詠桃

詠柳

詠箎

詠月

秋夜

悼往

六憶詩 四首

柳惲

擣衣 五首

獨不見

度關山

長門怨

江南曲

起夜來



七夕穿針

雜詩

詠席

詠薔薇

江洪

詠歌姬

詠舞女

詠紅綫

詠鶴

高爽

詠鏡  
詠畫扇

何子朗

詠玉階

學謝體

和虞記室騰古意

虞騫

和繆朗視月

范靜婦沈氏

戲繡娘



詠步搖花

詠五彩竹火籠

詠燈

何遜

日夕望江贈魚司馬

嘲劉諮議孝綽

擬輕薄篇

學青青河邊草

閨怨

看新婦

詠七夕

詠照鏡

詠妓

詠倡家

詠白鷗嘲別者

王樞

古意應蕭信武歌

徐尚書座賦得阿憐

至烏林村見採桑者因有贈

玉臺新詠卷六目錄終



玉臺新詠卷六

陳東海徐陵編 明歛方大法校

巫山高

范雲

巫山高不極白日隱光輝  
藹藹朝雲去冥冥暮雨歸  
巖懸獸無跡林暗鳥疑飛  
枕席竟誰薦相望徒依依

望織女

盈盈一水邊夜夜空自憐  
不辭精衛苦河流未可填  
寸情百重結一心萬處懸  
願作雙青鳥共舒明鏡前



閨思

春草醉春烟深閨人獨眠積恨顏將老相思心  
欲燃幾回明月夜飛夢到郎邊

送別

東風柳線長送郎上河梁未盡樽前酒妾淚已  
千行不愁書難寄但恐髮將霜望懷白首約江  
上早歸航

征怨

江淹

蕩子從征久鳳樓蕭管閑獨枕凋雲鬢孤燈損  
玉顏何日邊塵淨庭前征馬還

詠美人春遊

江南二月春東風轉綠蘋不知誰家子看花桃  
李津白雪凝瓊貌明珠點絳唇行人咸息駕爭  
擬洛川神

西洲曲

憶梅下西洲折梅寄江北單衫杏子紅雙鬢鴉  
雛色西洲在何處兩漿橋頭渡日暮伯勞飛風  
吹烏臼樹樹下即門前門中露翠鈿開門郎不  
至出門採紅蓮採蓮南塘秋蓮花過人頭低頭  
弄蓮子蓮子青如水置蓮懷袖中蓮心徹底紅



憶郎郎不至仰首望飛鴻  
鴻飛蒲西洲望郎上  
青樓樓高望不見盡日欄干頭  
欄干十二曲垂手明如玉  
卷簾天自高海水搖空綠  
海水夢悠悠君愁我亦愁  
南風知我意吹夢到西洲

古別離

遠與君別者乃至鴈門關  
黃雲蔽千里遊子何時還  
送君如昨日簷前露已團  
不惜蕙草晚所悲道路寒  
君在天一涯妾心久別離  
願一見顏色不異瓊樹枝  
兔絲及水萍所寄終不移

班婕妤扇

紈扇如團月出自機中素  
畫作秦王女乘鸞向煙霧  
彩色世所重雖新不代故  
竊悲涼風至吹我玉階樹  
君子恩未畢零落在中路

張司空離情

秋月映簾櫳懸光入丹墀  
佳人撫鳴琴清夜守空帷  
蘭徑少行迹玉臺生網絲  
庭樹發紅彩閨草含碧滋  
羅綺爲君整萬里贈所思  
願垂湛露惠信我皎日期

潘黃門述哀

青春速天機素秋馳白日  
美人歸重泉悽愴無



終畢殯宮已肅清  
松柏轉蕭瑟俯仰未能弭尋  
念非但一拊衿悼寂寞  
恍然若有失明月入綺  
窓髣髴想蕙質消憂非萱草  
永懷寄夢寐夢寐  
復冥冥何由覲爾形  
我慙北海術爾無帝女靈  
願言出遠山徘徊泣松銘  
雨絕無還雲花落豈  
留英日月方代序寢興何時平

休上人怨別

西北秋風至楚客心悠哉  
日暮碧雲合佳人殊  
未來露彩方泛艷  
月華始徘徊寶書爲君掩  
瑤瑟詎能開相思巫山渚  
悵望陽雲臺金爐絕沈

燎綺席徧浮埃桂水日千里因之平生懷

敬詔柳僕射征怨

丘遲

清歌自信妍雅舞空僊僊  
耳中解明月頭上落  
金鈿雀飛且近遠暮入綺羅前  
魚戲雖南北終  
還荷葉邊惟見君行久新年非故年

荅徐侍中爲人贈婦

丈夫吐然諾受命本遺家  
糟糠且棄置蓬首亂  
如麻側聞洛陽客金蓋翼高車  
謁帝時來下光  
景不可奢幽房一洞啓二八盡芳華  
羅裙有長  
短翠髻無低斜長眉橫玉臉皓腕卷輕紗  
俱着



依井蝶共取落簷花何言征戍苦抱膝空咨嗟

登高望春

沈約

登高眺京洛街巷何紛紛迴首望長安城闕鬱  
盤桓日出照鈿黛風過動羅紈齊童躡朱履趙  
女揚翠翰春風搖雜樹葳蕤綠且丹寶瑟玫瑰  
柱金羈玳瑁鞍淹留宿下蔡置酒過上蘭解眉  
還復歛方知巧笑難佳期空靡靡含睇未成歡  
嘉客不可見因君寄長歎

春思

楊柳亂如絲綺羅不自持春草黃復綠客心傷

此時翠苔已結洧碧水復盈淇日華照趙瑟風  
色動燕姬衿前萬行淚故是一相思

初春

夾道覓陽春佳人共携手草色猶自非林中都  
未有無事逐梅花空教信楊柳且復共歸來含  
情寄盃酒

昭君辭

朝發披香殿夕濟汾陰河於茲懷九逝自此歛  
雙蛾沾粧疑湛露繞臆狀流波日見奔沙起稍  
覺轉蓬多胡風犯肌骨非直傷綺羅銜涕試南



望關山鬱嵯峨始作陽春曲終成苦寒歌惟有  
三五夜明月暫經過

塘上行

澤蘭被荒徑孤芳豈自通幸逢瑤池曠得與金  
芝叢朝承紫臺露夕潤綠池風旣美修嫿女復  
悅繁華童夙昔玉霜蒲旦暮翠條空葉飄儲胥  
右芳歇露寒東紀化尚盈曷俗志信頽隆財殫  
交易絕華落愛難終所惜改驩盼豈恨逐征蓬  
願回昭陽景持照長門宮

携手曲

捨轡下彫輅更衣奉玉牀斜簪映秋水開鏡比  
春粧所畏紅顏促君恩不可長鷓冠且容齋豈  
吝桂枝亡

夜夜曲

河漢縱且橫北斗橫復直星漢空如此寧知心  
有憶孤燈暖不明寒機曉猶織零淚向誰道雞  
鳴徒歎息

有所思

西征登隴首東望不見家關樹抽紫葉塞草發  
青芽昆明池欲蒲蒲萄應作花流淚對漢使因



書寄狹斜

領邊繡

織手製新竒刺作可憐儀  
縈絲飛鳳子結縷坐  
花兒不聲如動吹無風  
自裊枝麗色儻未歇聊  
承雲髻垂

脚下履

丹墀上颯沓玉殿下趨鏘  
逆轉珠珮響先表繡  
桂香裾開臨舞席袖拂繞  
歌堂所嘆忘懷妾見  
委入羅牀

擬青青河邊草

漠漠牀上塵中心憶故人  
故人不可憶中夜長  
歎息歎息想容儀不言長  
別離別離稍已久空  
牀寄盃酒

擬三婦

大婦掃玉墀中婦結羅幃  
小婦獨無事對鏡畫  
娥眉良人且安卧夜長方  
自私

古意

挾瑟叢臺下徙倚愛容光  
佇立日已暮戚戚苦  
人腸露葵已堪擗淇水未  
沾裳錦衾無獨暖羅  
衣空自香明月雖外照寧  
知心內傷



効古

可憐桂樹枝單雄憶故雌歲暮異栖宿春至猶  
別離山河隔長路路遠絕容儀豈云無我匹寸  
心終不移

夢見美人

夜聞長歎息知君心有憶果自閨闔開魂交覩  
顏色既薦巫山枕又奉齊眉食立望復橫陳忽  
覺非在側那知神傷者潺湲淚沾臆

少年新婚爲之詠

山陰柳家女薄言出田墅丰容好姿顏便僻巧

言語腰肢既軟弱衣服亦華楚紅輪映早寒盡  
扇迎初暑錦履並花紋繡帶同心苜羅襦金薄  
厠雲髻花釵舉我情已鬱紆何用表崎嶇託意  
眉間黛申心口上朱莫爭三春價坐喪千金軀  
盈尺青銅鏡徑寸合浦珠無因達往意欲寄雙  
飛鳧裾開見玉趾衫薄映凝膚羞言趙飛燕笑  
殺秦羅敷自顧雖悴薄冠盖曜城隅高門列駟  
駕廣路從驪駒何慚鹿盧劔詎戒府中趨還家  
問鄉里詎堪特作夫

詠桃



風來吹葉動風去畏花傷紅映已照灼况復含  
日光歌童暗理曲游女夜縫裳詎戒當春淚能  
斷思人腸

詠柳

輕陰拂建章夾道連未央因風結復解沾露柔  
且長楚妃思欲絕班女淚成行遊人未應去爲  
此歸故鄉

詠篴

江南簫管地妙響發孫枝慙勤寄玉指含情舉  
復垂彫梁再三繞輕塵四五移曲中有深意冊

誠君詎知

詠月

月華臨靜夜夜靜滅氛埃方暉竟戶入圓影隙  
中來高樓切思婦西園游上才網軒映珠綴應  
門照綠苔洞房殊未曉清光信悠哉

秋夜

月落霄向分紫煙鬱氛氲曠曠螢入霧離離鴈  
度雲巴童闇理瑟漢女夜縫裙新知樂如是久  
要詎相聞

悼往



去秋三五月今秋還照房今春蘭蕙草春來復  
吐芳悲哉人道異一謝永銷亾屏筵空有設帷  
席更施張遊塵掩虛座孤帳覆空床萬事無不  
盡徒令存者傷

六憶詩 四首

其一

憶來時灼灼上堦墀勤勤叙別離慊慊道相思  
相看常不足相見乃亾饑

其二

憶坐時點點羅帳前或歌四五曲或弄兩三絃

笑時應無比嗔時更可憐

其三

憶食時臨盤動容色欲坐復羞坐欲食復羞食  
含哺如不饑擎甌似無力

其四

憶眠時人眠疆未眠解羅不待勸就枕更須牽  
復恐傍人見嬌羞在燭前

擣衣 五首

柳惲

其一

孤衾引思緒獨枕愴憂端深庭秋草綠高門白



露寒思君起清夜促柱奏幽蘭不怨飛蓬苦待  
傷蕙草殘

其二

行役滯風波遊人淹不歸亭臯木葉下壠首秋  
雲飛寒園夕鳥集思牖草虫悲嗟矣當春服安  
見禦冬衣

其三

鶴鳴勞永歎採菘傷時暮念君方遠遊望妾理  
紈素秋風吹綠潭明月懸高樹佳人飾淨容招  
携從所務

其四

步欄杳不極離堂肅已扃軒高夕杵散氣爽夜  
碁鳴瑤箏隨步響幽蘭逐袂生踟躕理金翠容  
與納宵清

其五

泛艷迴煙彩淵旋龜鶴文淒淒合歡袖冉冉蘭  
麝芬不怨杼軸苦所悲千里分垂泣送行李傾  
首遲歸雲

獨不見

別島望風臺天淵臨水殿芳草生未積春花落



如霰出從張公子還過趙飛燕奉箒長信宮誰  
知獨不見

度關山

長信倡家女出入燕南垂惟持德自美本以容  
見知舊聞關山遠何事揔金羈妾心日已亂秋  
風鳴細枝

長門怨

玉戶夜悄悄應門重且深秋風動桂樹流月搖  
輕陰綺簷清露滴網戶思虫吟歎息下蘭閣含  
愁奏雅琴何由鳴曉佩復得抱宵衾無復金屋

念豈照長門心

江南曲

汀洲採白蘋日暖江南春洞庭有歸客瀟湘逢  
故人故人何不返春華復將晚不道新知樂祇  
言行路遠

起夜來

城南斷車騎閣道覆清埃露華光翠網月影入  
蘭臺洞房且暮掩應門或復開颯颯秋桂響悲  
君起夜來

七夕穿針



代馬秋不歸緇紈無復緒迎寒理衣縫映月抽  
織縷的皜愁睇光連娟思眉聚清露下羅衣秋  
風吹玉柱流陰稍已多餘光欲難取

雜詩

雲輕暮色轉草綠晨芳歸山墟罷寒晦園澤閨  
朝暉春心多感動睹物情復悲自君之去矣蘭  
堂罷鳴機徒知遊宦是不念別離非

詠席

照日汀洲際搖風綠潭側雖無獨爾輕幸有青  
袍色羅袖少輕塵象床多麗飾願君夜闌飲佳

人時宴息

詠薔薇

當戶種薔薇枝葉太葳蕤不搖香已亂無風花  
自飛春閨不能靜開匣理明妃曲池浮采采斜  
岸列依依或聞好音度時見銜泥歸且對清觴  
湛其餘任是非

詠歌姬

江洪

寶鑷間珠花分明靚粧點薄髮約微黃輕紅澹  
鉛臉發言芳已馳復加蘭蕙染浮聲易傷歎沈  
唱安而險孤轉忽徘徊雙蛾乍舒歛不持全示



人半用輕紗掩

詠舞女

腰纖茂楚媛體輕非趙姬映襟闐寶粟緣肘挂  
珠絲發袖已成態動足復含姿斜睛若不眇嬌  
轉復遲疑何慙雲鶴起詎減鳳驚時

詠紅牋

雜彩何足竒惟紅偏作可灼爍類藻開輕明似  
霞破鏤質卷芳脂裁花承百和且傳別離心復  
是相思座不值情牽人豈識風流座

詠鶴

閑園有孤鶴摧藏信可憐寧望春臯下刷羽翫  
花鈿何時秋海上照影弄長川曉鳴動遙怨夕  
唳感孀眠哀咽芳林右憫默華池邊猶冀凌霄  
志萬里共翩翩

詠鏡

高爽

初上鳳凰墀此鏡照蛾眉言照長相守不照長  
相思虛心會不採貞明空自欺無言此故物更  
復照新期

詠畫扇

新絲本自輕弱彩何足眇直爲發紅顏謬成握



中扇乍奉長門泣時承栢梁宴思粧開已掩歌  
容隱而見但畫雙黃鵠莫作孤飛燕

詠玉階

何子朗

玉階已夸麗復得臨紫微北戶接翠幄南路抵  
金扉重疊通日影參差藏月輝輕苔染珠履微  
漱拂羅衣獨笑崑山曲空見青鳧飛

學謝體

桂臺清露拂銅陛落花沾美人紅粧罷攀鈎捲  
細簾思君暫促柱玉指何纖纖未應爲此別無  
故坐相嫌

和虞記室騰古意

美人弄白日灼灼當春牖清鏡對蛾眉新花弄  
玉手燕下拾池泥風來吹細柳君子何時歸與  
我酌樽酒

和繆郎視月

虞騫

清夜未云疲珠簾聊可發泠泠玉潭水映見蛾  
眉月靡靡露方垂輝輝光稍沒佳人復千里餘  
影徒揮忽

戲繡娘

范靜婦

明珠翠羽帳金薄綠綃帷因風時暫舉想像見



芳姿清晨挿步搖向晚解羅衣託意風流子佳  
情詎可私

詠步搖花

珠華縈翡翠寶葉間金瓊剪荷不似製爲花如  
自生低枝拂繡領微步動瑤瑛但令雲髻挿蛾  
眉本易成

詠五彩竹火籠

可憐閨霜質織剖復豪分織作迴風苴制爲縈  
綺文含芳出珠被曜彩接湘裙徒嗟今麗飾豈  
念昔凌雲

詠燈

綺筵日已暮羅帷月未歸開花散鵠采含光出  
九微風軒動丹焰冰宇澹清暉不畏輕蛾繞惟  
恐曉蠅飛

日夕望江贈魚司馬

何遜

湓城帶湓水湓水縈如帶日夕望高城眇眇青  
雲外城中多宴賞絲竹常繁會管聲已流悅絃  
聲復悽切歌黛慘如愁舞腰疑欲絕仲秋黃葉  
下長風正騷屑早鴈出雲飛故燕辭簷別晝悲  
在異縣夜夢還洛汭洛汭何悠悠起望登西樓



的的帆向浦團團日隱洲誰能一羽化輕舉逐  
飛浮

嘲劉諮議孝綽

房櫳滅夜火窓戶映朝光妖女褰幃出蹀躞初  
下床雀釵橫曉髮蛾眉艷宿粧稍聞玉釧遠猶  
憐翠被香寧知早朝客差池已鴈行

擬輕薄篇

城東美少年重身輕萬億拓彈隨珠丸白馬黃  
金勒長安九逵上青槐蔭道植轂擊晨已喧肩  
排瞑不息走狗通西望牽牛亘南直相期百戲

傍去來三市側象床香繡被玉盤傳綺食大婦  
掩扇歌小婦開簾織相看獨隱笑見人還歛色  
黃鶴悲故羣山枝詠新識鳥飛過客盡雀聚行  
龍匿酌羽方厭厭此時歡未極

學青青河邊草

春園日應好拆花望遠道秋夜苦復長抱枕向  
空床吹樓下促節不言于此別歌筵掩團扇何  
時一相見絃絕猶依軫葉落裁下枝卽此雖云  
別方我未成離

閨怨



曉河沒高棟斜月半空庭窓中度落葉簾外隔  
飛螢含情下翠帳掩涕閉金屏昔期今未反春  
草寒復青思君無轉易何異北辰星

看新婿

霧夕蓮出水霞朝日照梁何如花燭夜輕扇掩  
紅粧良人復灼灼席上自生光所悲高駕動環  
珮出長廊

詠七夕

仙車駐七驤鳳駕出天潢月照九微火風吹百  
和香來歡暫巧笑還淚已啼粧依稀猶洛汭倏

忽似高唐別離不得語河漢漸湯湯

詠照鏡

珠簾旦初捲綺羅朝未織玉匣開鑿形寶臺臨  
淨飾對影獨含笑看花空轉側聊爲出鬢眉試  
染妖桃色羽釵如可間金鈿畏相逼蕩子行未  
歸啼粧坐沾臆

詠妓

管清羅薦合絃驚雪袖遲逐唱迴纖手聽曲轉  
蛾眉凝情眄墮珥微睇託含辭日暮留嘉客相  
看愛此時



詠倡家

皎皎高樓暮華燭帳前明羅帷雀釵影寶瑟鳳  
雛聲夜花枝上發新月霧中生誰念當窓牖相  
望獨盈盈

詠白鷗嘲別者

可憐雙白鷗朝夕水上浮何言異栖息雌住雄  
不留孤飛出嶼浦獨宿下滄洲東西從此去影  
響絕無由

古意應蕭信武歌

王樞

朝取饑蚕食夜縫千里衣復聞南陌上日暮採

蓮歸青苔覆寒井紅藥閒青薇人生樂自極良  
時徒見違何由及新燕雙雙還共飛

徐尚書座賦得阿隣

紅蓮披白露玉貌映朝霞飛燕啼粧罷顧插步  
搖花盞匝金鈿滿參差繡領斜暮還垂瑤帳香  
燈照九華

至烏林村見採桑者因有贈

遙見提筐下翩妍實端妙將去復迴身欲語先  
爲笑閨中初別離不許覓新知空結茱萸帶敢  
報木蘭枝



玉臺新詠卷六終

玉臺新詠

卷六終

玉臺新詠

玉臺新詠

玉臺新詠

玉臺新詠

玉臺新詠

玉臺新詠

玉臺新詠

玉臺新詠卷六終





